

Duce de Venetia, fido sopra tutti li re et soldani, quale esso Idio mantegni in alegrezza et conservi in sanità. Vi facciamo intender come abiamo recepute le letere vien portate per li mercadanti vostri de le galie di Alexandria, per le qual ne notificate or uno anno esse vostre galie non aver fato in Alexandria contrato alcuno, et per questo perchè li mereadanti nostri di Alexandria volevano vender le lor specie a li mercadanti vostri, cussi a quelli stano fermi in Alexandria, come a quelli de le galie per più de quello le valevano; sichè in Venetia non se poteva star, perchè essendo venute spetie assai de Colocut in quelle parte per via de Portogalo, li precii de esse specie sono calati, et per la venuta al presente de li patroni et mercadanti con le galie vostre, se avemo grandemente alegrato, atribuendo ciò a la felice sorte del nostro excelentissimo Signor principe da li fatti, maximo Re de tutte le nation, sultan di arabi et persiani, re de la città del Cayro et territorio suo et de la città de Damasco et de li porti et marine sue e de tutti li liti de musulmani, che Iddio stabilisca el regno et imperio suo, et lo exercito et baronia sua sia vitoriosa, et *etiam* la nostra liberalità et bonlà. Et diti vostri mercadanti non hanno da noi se non bona compagnia in questi nostri porti, *quod reliquum est*. La Signoria del Doxe ha mandà le galie *ad complacentia* del prefato excelentissimo Re, principe de li fati: che lo altissimo Iddio li dia sempre victoria, et nostra *etiam*, ancorchè nè mereadanti, nè altri expectasseno utele alcuno; et ciò ha fato Sua Signoria *tantum* per la bona fama de esso Signor principe dei fatti: che lo Altissimo Iddio lo fazi sempre vitorioso. Et la Signoria de esso Dose priega la excelentia nostra facia scriver uno comandamento a quelli sono preposti a la intrada de Alexandria, che togliano quanto solamente vuol li capitoli de li mercadanti veneti, sicome apar in le letere vostre, la qual cosa havemo inteso, la Signoria del Doxe, sia che li mereadanti mori, christiani et de ogni altra generation sono sottoposti al Signor principe de i Fatti; che Iddio lo conservi sempre in victoria et a nui *etiam*. Et benchè in questi tempi sancti del Signor principe di Fati, che Idio lo exalti sopra tutte le nation, niun vengi molestato, nè offeso, et a tutti li populi, quali stano soto l'Impero suo, se facia justitia et quelli vivano pacifica et securamente; che lo altissimo Iddio slonga la sua vita, havemo *tamen* scritto uno comandamento al signor de Alexandria et a quelli administrano li danari pubblici, che i debano tuor da li mercadanti veneti el datio secondo vuol li capitoli hanno ne le loro mano,

fatti justa l'ordine del Signor principe de le facende, et a quelli sia fatta bona compagnia senza dispiacer alcun. Nui veramente vossamo che 'l Dose imponesse a li soi mercadanti che *de cætero* venirano *cum* galie o altri navilii de qui, non melesseno mazor pretio a le lor robe de quello valeno, perchè noi non volemo se non che le merchadantie corano et se fazi contratto, et che ogni homo se contenti de quel che manda Dio, et che tutti possino star contenti et con el cor alegro, pregando che i zorni del Signor principe di Fati siano longi et i nostri *etiam*, et cussi havemo per nostre excelentissime letere ad intelligentia vostra resposo a le vostre: lo altissimo Iddio mantengi in perpetua alegrezza et conservi in sanità la Signoria del Doxe.

*Data die 12 lunæ Sepher 926, quod est die 6 Februarii 1519.*

*Ricevuta die 13 Mai 1520.*

In questo Consejo, fu fato eletion di Capitano a 293<sup>4)</sup> Verona, justa la parte. Rimase sier Francesco da cha' da Pexaro, fo savio a Terra ferma, qu. sier Nicolò dopio: ave 877, 698. Sier Andrea Basadona el consier, 739, 873; sier Almorò Donado, fo podestà a Padoa, 523, 1054. *Item*, Avogador extraordenario, rimase sier Lorenzo Bragadin, è di Pregadi, qu. sier Francesco, 823, 685; sier Zuan Antonio Venier, fo ai X Uffici, qu. sier Jacomo Alvise dopio, 814, 707; sier Vettor Morexini, fo Provedador sora la Sanità, qu. sier Jacomo, 328, 1172. Provedador a le biave, in luogo di sier Alvise Zen, a chi Dio perdoni, sier Piero Malipiero, qual rimase Domenega di Pregadi. E cussi va la fortuna, e rimase da mi. Di la Zonta niun non passoe; tolto sier Nicolò Pasqualigo, fo di la Zonta, qu. sier Vettor.

Fu fato a Mestre la mostra di fanti 150 di Borge contestabile, et a farla andoe sier Francesco Contarini savio a Terra ferma, qu. sier Zacaria el cavalier; i quali fanti dieno andar in Cypri.

*A dì 14.* La matina, in Colegio nulla fu, ni lettere da conto, ni da Constantinopoli dil Baylo nulla si ha; qual per le ultime dovea fin 5 zorni scriver.

Vene sier Nicolò Dolfin, fo capitano a Bergamo, stato ad Axola a formar processo per il caso di Rizin di Daini di Asola, per la morte di quel citadin nominato Zuan Francesco Trucho, et referi con li Cai di X il tutto.

È da saper, havendo sier Marco Loredan, l'Avogador di comun, intromesso le pruove fate di anni

(1) Le carte 292 e 292\* sono bianche.